

# S'klappt doch nix

## Sketch zum hundertjährigen Bammentaler Kirchenjubiläum

von Michael Mende

(Eine sehr alte Frau sitzt da, ein Mann, nennen wir ihn einfach Karl, beobachtet sie.)

Karl:	Ein Heidereschpek d hewwe sie alle vor derre do! Dodebei isch des doch nur ä aldi Kraudaran! Awwa uffreidlich bis zum dotnaus. Koum, dass ohna drei Schritt onn sie nogeht, fängt sie schun oh zu geifare! Desdeweje traut sich kohna on die droo! Awwa hait isch mir des grad egal. Muss die alt Schachtl doo midde drin hocke? Hait kriegd sie's gsaat, un wonn sie uff de Sau nausgeht. (zur Alten) He, Sie doo!
Alte:	Los ma mei Ruh!
Karl:	Isch deet Ehne gern mol was sare!
Alte:	Oh lehn ma doch grad ä Reichsmark!
Karl:	Sie, isch will jo net uhöflich sei, awwa Johr um Johr hogge Sie do rum un gugge bäis! Unn hait isch Kärschejubiläum, do will man guut gelaunt sei, do will ma feiare, doo will ma koo Lait do rumhogge hawwe, wu nur ä bleeds Gsischt mache.
Alte:	Du Daigtreter! Hock die uff Dein Gaul un mach das'd fortkummsch! Awwa flieg net runna, - weil, - s'klappt jo doch nix.
Karl:	Wie? Uff mein Gaul? Guti Fraa, derf'd isch ämol froore, wie alt Ihr seid?
Alte:	D'ihre liebe Lait, wie alt dass isch bin, will'a wisse. Do muss'i grad ämol rechle: hm ... vätzäh achtzäh ... hm ... dreissischjähriger Krieg ... hm ... evongelisch worre ... hm ... Hons vun Härshorn ... hm ... awweil hawwi's: nächste Dunnaschdag wärr'i 604 Johr alt!
Karl: (zum Publikum)	Wisst a was? Isch glaab grad, die Alt isch nimmi gonz Bacha! Guti Fraa, horsch'd ämol, wonn Ihr werklich sou alt wärt, donn heed Ihr schun längst sterwe messe!
Alte:	Nadirlich heed'i schun längschd sterwe messe! Sou alt wie isch wärd doch koo Sau!
Karl:	Unn warum seid'a noch net gschdorwe?
Alte:	Ha, s'klappt halt nix!

Karl:	Wie, s'klappt nix?
Alte:	Än Bommedal unn än Reilse klappt de Lebtag nix! Desdeweje bin isch net gschdorwe, weil net ämol des klappt!
Karl:	Sou allgemein kann ma des doch net sa...
Alte:	Gedenkt Dir der Hons noch?
Karl:	Wella Hons?
Alte:	De Junka Hons vunn Härschhorn, war vätzähneinzisch Patronatsherr vun de Pfarrgemeinde, gedenkt Dir des nimmi?
Karl:	Ich hab koo Gschichte studiert.
Alte:	Hosch net des Heftl doo glese? Der hott uff Bommedal busiert!
Karl:	Uff Bommedal busiert? Un des steht äm Kärscheheftl? Unn mit wem hota'n busiert?
Alte:	Ha mit mir hot'a busiert, Du Daigdreta! Unn sou ebbes steht nadierlich net äm Kärscheheftl. Äm Kärscheheftl, sou än Bapp, wonn do neischreibsch, wer alles mit wem busiert, do meschdsch ä Kärschebuch mache.
Karl:	Hehe, awwa immerhin: s'hot was geklappt
Alte:	Was babblsch?
Karl:	Ha, dass Ihr mit dem Junker Hons vunn Härschhorn busiert habt, des hot doch geklappt!
Alte:	Ach was, vumm Blitz isch'a getroffe worre, wu'a vum Jagdschlessl homzu gritte isch.
Karl:	Ou, des duutt ma awwa leid!
Alte:	Nix klappt, gar nix. Unn donn, knapp 150 Jahr später senn ma unnam Otthoinrich evongelisch worre.
Karl:	Awwa des hot doch geklappt! Mit dem evongelisch wärre vun Bommedal un Reilse, sell hot geklappt.
Alte:	Oh, her ma uff. Nix hot geklappt, rumgeklopft hewwe sie sich mit denne wu net evongelisch worre senn, dreissisch Jahr long, alles hie gmacht!
Karl:	Awwa guti Fraa, der dreissisch-jährische Krieg, des isch doch ewig her, des isch doch schun gar nimmi wohr, des isch doch schun long vorbei! Om End hot des jedenfalls friedlich geklappt!

Alte:	Sou, senn sie widda zomme?
Karl:	Ha, des noch net graad...
Alte:	Sag isch's net, nix klappt, gar nix. 1747 hewwe sie die ald Kärsh abgrisse, weil nix geklappt hot.
Karl:	Unn schunn 1748 war die nei fäddisch unn am 13. Oktober war unnam Pfarra Hilschbach Kärshweih!
Alte:	Unn sogar änn Bach hewwe sie umgleigt ghabt, fa die Kärsh. Des hott der Bach awwa net so recht eigsehe und isch weidas durch die Kärsh durchgflosse. Unn wonn sie ä Kind gedaft hewwe, hott der Kärshediena ersch die Forelle aus'm Taafwassa rausfonge messe! Unn net ämol 100 Jahr späta war sie schun widda hie. Un donn isch ah noch die Glock runnaghagt un hot sou'am aame Schlucka de Haxa abghaare! No, no, isch sag da: Nix klappt.
Karl:	Awwa vor hunnat Jahr isch ä neii Kärsh gebaut worre. Des feiare ma doch...
Alte:	Vor hunnat Jahr, Du moonsch nainzeh-vier? 1903 heed die nei Kärsh fäddisch sei solle, Du Hornjärg, 1903! Awwa die Baufirma war nix gwest und donn isch än Sturm kumme, unn hot des Baugericht zommegedrosche, dass es grad sou gerumpelt hot. Do driwwe hot's ä Haisl zommeghaare, und wonn die Beckin net grad uffm Botschomba ghockt wär, wär's schlimm ausgonge. Die feierlich Einweihung hot also äscht am 15. Mai 1904(!) stattfinne kenne. Nix klappt, isch saag's jo, nix klappt!
Karl:	Guti Fraa: Guckt ämol do no! Des isch de Sängerbund. Unn die singe jetzat ä Lied. Ihr wärt ämol sehe, wie des klappt!
Alte:	Ach was, de Lebdaag klappt do net ebbes!
Karl:	Kummt seid so gut, singt jetzt ä Lied und zeigt derre Fraa mol, dass ah ebbes klappt.

(Lied)

Karl:	Unn, hot des geklappt?
Alte:	S'heet schun klappe kenne, wonn alle vum erschde Tenor dieselwe Note gnumme heede! Unn wonn man donn noch de Baß vorher uffgweckt heed, heed a de Dirigent koon sou än dicke Hals kriegt! No, no, nix klappt!
Karl:	Bei Eich klappt nix, weil Ihr net sehe wollt, dass was klappt, sou wärd's sei! Unn was isch mit dem Feschd?
Alte:	Was soll donn sei?

Karl:	Des Feschd doo klappt doch awwa.
Alte:	Ah was!
Karl:	Ihr liewe Leit, ihr liewe Feschgäschd, keent Ihr mir mol helfe, und derre gute Fraa sare, dass unsa Feschd hervorragend klappt! Also bitte: Klappt's oder klappt's net?
Alte:	Tatsächlich, denne gefällt's schäins. Ha sare mol: Des wär jo s'ersche Mol, dass än Bommedal unn Reilse ebbes geklappt heet!
Karl:	So isches!

(Alte steht auf und geht)

Karl:	Ha, was isch än jetzt lous, wu wollt'a donn no?
Alte:	Isch geh jetztat stärke! Mit 604 Johr isch des net vakehrt und wonn eia Feschd klappt, donn messt des doch jetztat ah klappe!
Karl:	Ah guti Fraa, mir hewwe ä Feschd, do kann ma doch net ofach sterwe.
Alte:	Alla gut, vunn mir aus, no feschdle ma jetzt, donn rohme ma uff unn wer Luscd hot, der kann jo donn oschließend noch sterwe, net wohr?
Karl: (zum Publikum):	Allagut, sou mache ma's. Awwa ah nur: Wonn's klappt!